

- राज्य मांय पड़ रही जोरदार गर्मी बीचे आज पश्चिमी विक्षोभ रा असर ऊं केई ठोड़ां छांटो-छिडको व्हयो अर बिरखा व्ही।
- दूरसंचार विभाग साइबर अपराधां सारू इस्तेमाल करी ज्या 28 हजार ऊं बत्ता मोबाइल हैंडसेट ने ब्लॉक करण बाबत हुकम दीना।
- प्रदेश मांय खाण-पीण री सामग्री मांय भेळ-चोळ रे खिलाफ चलाया जा रह्या अभियान रा तैत केई जिलां मांय खाद्य सुरक्षा विभाग कार्यवाही कीनी।
- राज्य मांय परशुराम जयंती अर आखातीज परम्परागत धार्मिक सिरधा सागे मनायी ज्या।

000

राज्य मांय पड़ रही जोरदार गर्मी बीचे आज पश्चिमी विक्षोभ रा असर ऊं केई ठोड़ां छांटो-छिडको व्हयो अर बिरखा व्ही। **कोटपूतली-बहरोड** जिला रा बानसूर हलका मांय दोपहरां पाछे करीब आधा घंटा ताई ओळा पड्या अर विराटनगर कने बावड़ी मांय ई करीब आधा घंटा ताई मेह बरस्यो। **झुंझुनूं** जिला मांय पिलानी कने बेरी, रामपुरा अर हमीनपुर गांवां अर सूरजगढ़ अर बुहाना हलकां मांय सिंज्यां री पोर ओळा पड्या अर बिरखा व्ही। **करौली** जिला मांय दोपहरां पाछे केई ठोड़ां छांटो छिडको व्हयो। **उदयपुर** मांय ई सिंज्या री पोर बिरखा व्ही। **श्रीगंगानगर** मांय व्ही बिरखा रे कारण खुला मांय पड़ी साखां भीज गयी। **हनुमानगढ़** जिला मांय रावतसर कने किकरालिया गांव मांय ई बिरखा व्ही। **चित्तौड़गढ़** मांय ई सिंज्यां री पोर व्ही बिरखा ऊं गर्मी ऊं साता मिली। **दौसा** मांय ई दोपहरां पाछे तेज अंधड़ सागे छांटो-छिडको व्हयो अर कठे-कठे जोरदार मेह बरस्यो। जयपुर मांय ई सिंज्या री पोर छांटो-छिडको व्हयो। **मौसम केन्द्र जयपुर** रा निदेशक राधेश्याम शर्मा बतायो के काल ई बीकानेर, जोधपुर, अजमेर, उदयपुर, कोटा, जयपुर अर भरतपुर संभाग मांय कठे-कठे आंधी चालण अर बिरखा व्हेवण रा आसार है।

ई बीचे प्रदेश रा केई हलकां मांय तेज तावड़ो पड़ रह्यो है, जिण ऊं मिनखां अर जीव-जिनावरां ने घणी परेशानी व्हे रही है।

0000

दूरसंचार विभाग-डीओटी, साइबर अपराध करण सारू देशभर मांय काम लिया ज्या 28 हजार दौ सौ मोबाइल हैंडसेट ब्लॉक करण रा हुकम दीना है। महकमो आं मोबाइल हैंडसेट ऊं जुड्या 20 लाख मोबाइल कनेक्शन्स ने ओजू सत्यापित करण रा हुकम ई दीना है। ऐडो नी व्हेवण री सूरत मांय ऐ कनेक्शन्स बंद करण रा हुकम दिया ज्या है।

0000

जयपुर रा राजस्थान इंटरनेशनल सेंटर मांय आज पत्र सूचना कार्यालय री ओर ऊं क्षेत्रीय मीडिया सम्मेलन "वार्तालाप" राख्यी ज्यो, जिण मांय खबरनवीसां ने लारला दिनां बदली करी ज्या भारतीय नागरिक सुरक्षा संहिता 2023, भारतीय न्याय संहिता 2023 और भारतीय साक्ष्य अधिनियम 2023 रा बारा मांय जाणकारी दीरीजी। सम्मेलन रा उद्घाटन सत्र मांय पुलिस कर्मचारियां री सिखावण रो काम देख रही अतिरिक्त पुलिस महानिदेशक, डॉ. मालिनी अग्रवाल कह्यो के आं आपराधिक कानूनां मांय बदलाव ऊं न्याय देवण रा काम मांय तेजी आवेला, जिण ऊं पीड़ित लोगां ने न्याय मिलण मांय आसानी व्हेला।

सम्मेलन रा दूजा सत्र मांय रिटायर्ड एडिशनल एस.पी. जगमोहन शर्मा बतायो के बदली करी ज्या कानूनां मांय ट्रांसजेंडर शब्द काम लियो ज्यो है अर संगठित अपराध रो जिक्र करण सागे ई खास मामलां मांय सामुदायिक सेवा रो प्रावधान ई करी ज्यो है।

सत्र मांय गृह मंत्रालय रा सेंट्रल डिटेक्टिव ट्रेनिंग इंस्टीट्यूट रा समन्वयक अशोक चौहान तीन ई कानूनां रा बारा मांय चर्चा कीनी। तकनीकी विशेषज्ञ एडवोकेट निशीथ दीक्षित नुवा आपराधिक कानूनां मांय भारतीयता रो जिक्र करता थकां आं मांय शामिल साइबर अपराधां अर डिजिटल सबूतां ऊं जुड्या कानूनां री बारीकियां रा बारा मांय जाणकारी दीनी अर 'डिजिटल बाय डिजाइन' ट्रायल री सोच रा बारा मांय विगतवार बतायो। कार्यक्रम मांय पत्र सूचना कार्यालय जयपुर री अपर

महानिदेशक ऋतु शुक्ला कह्यो के आपराधिक कानूनां मांय करी ज्या आं बदलावां रा बारा मांय जाणकारी जनता तांई पूगावण मांय मीडिया रो खास काम है।

000

प्रदेश मांय मिलावट-खोरां रे खिलाफ चिकित्सा विभाग अर खाद्य सुरक्षा विभाग री ओर ऊं चलाया जा रह्या अभियान रा तैत खाण-पीण री न्यारी-न्यारी सामग्री रा नमूना लिया जा रह्या है। कोटपुतली-बहरोड़ जिला रा बहरोड़ मांय एक गोदाम ऊं 18 कार्टन अवधि पार रसगुल्ला नष्ट करवायी ज्या। कार्रवाई रे दौरान दही, पनीर अर रसगुल्ला रा नमूना लिया ज्या। जयपुर रा खाद्य अर औषधि नियंत्रण आयुक्तालय रा अतिरिक्त आयुक्त पंकज ओझा आज बूंदी रा खाद्य सुरक्षा अधिकारी सागे एक चावल मिल री जांच कर र चावल रा नमूना लीना।

000

जयपुर रा जे. के. लोन अस्पताल मांय प्लाज्मा चोरी रा मामला मांय ब्लड बैंक रा इंचार्ज डॉ. सत्येन्द्र चौधरी ने एपीओ कर दियो ज्यो है। चिकित्सा अर स्वास्थ्य विभाग री अतिरिक्त मुख्य सचिव शुभ्रा सिंह बतायो के जे के लोन अस्पताल मांय लैब टेक्नीशियन कानी ऊं प्लाज्मा चोरी रा मामला रा खुलासा पाछे लैब टेक्नीशियन किशन सहाय कटारिया ने मुअत्तल कर दियो ज्यो अर एफ.आई.आर. दर्ज करवायी ज्यी ई। वे बतायो के मामला री जांच सारू बणायी ज्यी समिति री रपट मांय ब्लड बैंक रा सीसीटीवी कैमरां री रिकॉर्डिंग नी मिली।

000

आज परशुराम जयंती अर आखा तीज धार्मिक सिरधा भाव सागे मनायी ज्या। आखा तीज रे मौके अबूझ सावो मान्यो जावण रे कारण ब्याह अर दूजा मांगलिक काम व्हे है। **करौली** मांय माली समाज रो सामूहिक विवाह सम्मेलन राख्यी ज्यो। **पाली** मांय आखातीज रे मौके नान्हा टाबर-टाबरी बींद बींदणी रो स्वांग कीनी। जूना जमाना ऊं चली आ रही आ रीत आज ई निभायी जावे है। ई मौके **बीकानेर** मांय पतंगबाजी करीजी। ई दौरान व्हेवण वाळा हादसां रे कारण जख्मी लोगां रा ईलाज सारू शहर रा पी. बी. एम. सफाखाना मांय खास इन्तजामात करी ज्या। परशुराम जयंती रे मौके केई ठोडां भगवान परशुराम री तस्वीर सागे प्रभातफेरी निकाळी ज्यी। **पाली** मांय घरां मांय भगवान परशुराम री पूजा-अर्चना करी ज्यी। **बाड़मेर** मांय किसान खेतां मांय खेजड़ी अर हल री पूजा-अर्चना कीनी। ई मौके पारम्परिक खेल **औंधल खेटो** खेली ज्यो।

अजमेर मांय पुष्कर रोड़ रा परशुराम मिन्दर मांय धार्मिक कार्यक्रमां सागे भण्डारों राख्यी ज्यो। अजमेर रा अदालत परिसर रा मिन्दर मांय ई भगवान परशुराम री महाआरती कर र प्रसाद बांटी ज्यो। श्रीगंगानगर मांय परशुराम जयंती रे मौके हवन अर यज्ञ सागे प्रतिभावां रो मान करी ज्यो अर शोभायात्रा निकाळी ज्यी। जयपुर रा आमेर मांय कुण्डा गणेश मिन्दर ऊं अम्बेकेश्वर महादेव मिन्दर तांई वाहन रैली निकाळी ज्यी। **चूरू, टोंक, झालावाड़, जोधपुर ग्रामीण अर बाड़मेर** जिलां मांय ई केई ठोडां भगवान परशुराम री शोभायात्रा निकाळी ज्यी। बांसवाड़ा जिला रा लिमथान गांव रा परशुराम मिंदर मांय हवन पूजन रा कार्यक्रम राख्यी ज्या अर मेळो भर्यो।

शहर रा कुशल बाग मैदान ऊं शोभायात्रा निकाळी ज्यी। प्रधानमंत्री नरेन्द्र मोदी आखा तीज रे मौके जनता ने शुभकामनावां दीनी है। सोशल मीडिया पोस्ट रे जरिये वे लोगां मांय दूजां रा भला री भावना ने बधावो मिलण, सगळां री जिंदगी मांय नुवी ऊर्जा अर उमाव री कामना कीनी।

000

राज्य सरकार री कंपनी राजस्थान स्टेट गैस लिमिटेड री ओर ऊं कोटा मांय 25 हजार ऊं बत्ता लोगां ने ग्रीन एनर्जी -क्लीन एनर्जी रो सुबीतो मुहैया करा दियो ज्यो है। कंपनी रा प्रबंध निदेशक रणबीर सिंह आ जाणकारी दीनी। वगे बतायो के आर.एस.जी.एल. कोटा मांय 5 हजार 64 पिरवारां ने डोमेस्टिक पाइपड नेचुरल गैस डी.पी.एन.जी. रो सुबीतो मुहैया करा दियो ज्यो है। आर.एस.जी.एल. री ओर ऊं कोटा, नीमराना अर कूकस मांय ई अ सुबीता मुहैया करावण बाबत् काम कर्यो जा रह्यो है।

000

प्रदेश मांय पंजीयन अर मुद्रांक विभाग रा सगळा पूर्णकालिक 114 उपपंजीयक कार्यालय अब थावर अर दीतवार ने ई खुलेला। विभाग रा महानिरीक्षक बतायो के जनता रा सुबीता सारू ऐ हुकम जारी करी ज्या है। इण ऊं कागजातां रा रजिस्ट्रेशन समेत दूजा काम छुट्टी रा दिन ई व्हे सकेला।

000

जयपुर रा नाहरगढ़ बायोलॉजिकल पार्क मांय बाघिन 'रानी' आज तीन बच्चा जण्या। उप वन संरक्षक जगदीश गुप्ता बतायो के आ बाघिन मार्च 2021 मांय ओडिशा रा नंदनकानन ऊं जयपुर लायी ज्यी

ही अर ग्वालियर रा गांधी जूलॉजिकल पार्क ऊं लायी ज्या बाघ शिवाजी सागे इण रो जोड़ो बणायी ज्यो ।

000

राजसमंद रा चारभुजा थाना हलका मांय एक कार री टक्कर ऊं पैदल जा रही एक ही पिरवार री एक बुजुर्ग महिला अर एक टाबरी री मौत व्हे ग्यी । **जैसलमेर** जिला रा रामदेवरा कस्बा रा राम सरोवर तळाव मांय डूब जावण ऊं एक जणा री मौत व्हे ग्यी । रामदेवरा पुलिस गोताखोरां री मदद ऊं लाश बाहर निकाली ।

000

जयपुर रा जवाहर कला केंद्र मांय पैली वाळी आई ए एस अहलकार शुचि शर्मा कानी ऊं बणायी ज्या फोटुआं री प्रदर्शनी लगायी ज्यी । चित्रकला प्रदर्शनी का उद्घाटन किया । पर्यटन कला, संस्कृति विभाग री प्रमुख शासन सचिव गायत्री राठौड़ इण रो उद्घाटन कीनो । ई मौके वे कह्यो के प्रतिभा रा दरसाव री कोई उम्र नी व्हे है । प्रदर्शनी मांय शुचि शर्मा कानी ऊं बणायी ज्या 100 ऊं बत्ता फोटुआं रो दरसाव करी ज्यो है ।

000